

305

20



始



梅翁詩鈔四

五言大其自士從寄贈本

江甯汪士鐸

甥上元吳達重校刊

楊四留宿

咸豐十一年辛酉

春山三兩家新筍已成竹門前老佃夫縛竹編茅屋虛  
堂移匡牀中廚饋齋粥自云田家貧伏蜡始食肉繞宅  
多樹杉廢圃偶莖菊時藟需將才檠戟徧宗族自愧筋  
力衰畎畝伴黃犢三河覆全師又爲塞翁福去年風雨  
和儲米七十斛鹽豉幸知釀差不負吾腹語久月出斗  
拂草止予宿瓦瓶留榻前椒薑點茶熟

代楊四誠子

咸豐十一年辛酉

湖漁歲賣鳧百錢市母一午眠勿驚擾月生子十七竹



言四  
桶召游蜂蜂飽割其蜜森森百株桐子油稠如漆離離  
滿坡楮皮紙利伴筆田家有貨殖豈不匹四術鄰人之  
粵海厥貲本盈室未聞操奇贏惟聞耽淫佚立身無巧  
拙住足貴翔實凶悔吝有三百占偶一吉厥志圖享受  
爲謀已先失願子味我言勿文惟以質

但幼湖來訪予柏家冲

咸豐十一年辛酉

患難同依人與君幸相識茅亭坐竹陰語語布胸臆烽  
鏑滿岳陽豈只飛無翼吾將西入關君必返京國自奮  
哀桑榆後顧頗荆棘天或飭夸娥兩山負以力林深鳥  
相依語久日無色鄰人饋菜把爲君設蔬食送君望雲  
夢前途莽無極

說士東閣丹初

同治元年壬戌

連營萬馬屯馬豈皆千里後車數十乘豈皆百金士惟  
使徵辟版入網必黃綺微彼腹背毳於身僅枝指惟以  
江海深不拒溝瀆水譬之緇流多得法者誰子禮部頒  
度牒未聞以此止所求不荆榛閒亦獲杞梓說士吾素  
甘期公勿充耳

罪言

壬戌

斬刈動踰萬患在補之速民窮或反本患在舊俗復人  
滿地不益龍蛇且起陸俗侈不示儉盜賊嘯空谷賢人  
綜核政僅足儆受祿解后木金饑乞活覆邦族何如飭  
司閭生女勿使育大農持利權捐輸只入穀禮臣掌教

化首禁文郁郁嘉予六合內其知榛狂福力行三十年  
可封且比屋牧之有罪言盛世或免戮

題蔣寅昉故交遺翰卷子

桐陰炎歊清展卷仰耆耆遙知主人賢賓客集尊酒文  
字金石搜學術漢宋剖雅故宗三蒼簡冊聚二酉它年  
志文苑燦若星環斗西風吹紅巾毛面誇身手宛轉溝  
壑餘或不得中壽余生景哲彥較業柰培塿端策得咎  
徵飾巾步厥後翠如始其息在斯某與某遺書未寫定  
何言時不偶寂寞裝池人相期綴下走

招隱

審分方期榮迂疏敢從政非云泉石高聊適麋鹿性秋

寒識桂芳雲深仰松勁枕流勵高風織履志獨行密蘿  
帶茅舍澄潭皎明鏡釣水鷗亦馴馴藥鶴先迎寄言同  
志人無孤小山詠

箕穎當有虞飲牛或洗耳何嘗買青山富貴如脫屣夫  
耕妻播種一室園與綺尙厭鹿門遠賃屋近吳市東鄰  
桑苧翁相招話元理似聞終南徑頗足營金紫歸語稚  
髻人封禪文足鄙

丙寅正月廿三日送李眉生觀察徐海

春風如仁人出輒作霖雨怒而爲震電威稜亦仁煦澤  
大無私施斥鹵草盡庶徐方俗强悍其民冠而虎厥初  
歲治河畚揭競捧土三汛慶安瀾萬家獲鍾鬴兒童入

村學婦女時媚嫵河公旣北徙閒民失恃怙人滿互伎  
求土瘠斯憂苦探丸嘯羣醜張鼓其弓鼓細則蠶與蜂  
鉅或成獍獠每當黍稷華伏莽肆攫取優柔旣釀亂駢  
誅真不武大賢奮英姿必能變朽腐淵居達綢繆先與  
籌召杜泐泗水利溥高粱窳宜稔故瀆徧菽麥霑足十  
萬戶茹茅拔雄桀勒什什伍伍若身使臂指是在善循  
拊美言煖挾纊豈必畏蕭斧明公握虎符惠澤逾淮浦  
青徐揚豫閒才大小武庫鄙儒念昔游略記邛竹筠芻  
蕘古所詢傳語當出祖遙卜徐海岷酤酒相歌舞

同治四年周縵雲先生召作東坡生日

坡公千春襄報以千春壽誰契吳絳悵蓬山老尊宿傑

閣峙冶城虛明吞遠岫芬馨薦燒猪才彥一卮侑公如  
騎鶴翔後學記欲奏茲逢陵谷變眾眇莫一覲山童川  
亦堙民氣競鄙陋上宰思陶甄鬻舍此興構隻手浴日  
月干戈化俎椹仙人抹世殷春風滿懷袖藉公嶽降辰  
嘉召徧耆舊拈花示宗旨珠璣萬斛富高嵐容纖埃巨  
流納微溜厚風掃陰霾杲如日當晝庶幾百世士釋褐  
睹文繡公靈徧海內歲歲此飲酌賓主飫餒餘霑溉及  
左右

丁卯冬日作

萬類紛歧途心爲不羈馬銜勒一以緩頓轡若襄野塞  
穿杜其幾蔽明義已下見好思則遷釐軌不可把素衣

倏染緇康莊終焉舍哲人懷朽索養之以欲寡顧其馳  
驚念猶同金在冷朱君養防銜撼御以風與雅科斗辨  
周鼎雷回羅商鞅嶧山秋訪碑漳臺春尋瓦竹窗鑪熏  
清摩抄日陶寫世無九方歎誰學古人者茲譬鳴和鸞  
協采齊肆夏昔爲江漢遊悔未結汐社徒令望晴川思  
君如白也

四岳一首上湘鄉公

四岳大何如苞孕固九有崢嶸植天柱盤踞控地紐南  
服哀炎荒北徼壯鎖鈕檢玉納龜鳧垂旒翦鷄首大者  
郡國傳細亦土壤受陰陽深亭毒雨露蘊企內窮崖日  
虧蔽鳴境相怒溪壑嘯射工溼積煦蝓蟲嘖羿矢注

味臬羊髮被肘喋血腥鸞尹肝腦充糝糗鬼謀社猶賽  
尉醉耳充琇荆揚雍梁閭割剝靡男婦清時際 唐  
虞蕩滌蘇陽九鼇極無常陂降神生帝右奮呼起祝融  
提攜及陵阜高直接風霆遠不遺菁韭太陰庭氏關禮  
謁其叔狃砮蒺覆厥巢獮獬殲其醜自弊禽祀祈暨貫  
棹沈湫旄倪返之廬牡酒速諸舅乾清而坤夷尊卑不  
雜蹂惟 帝坐明堂垂衣釐瓚卣中階翊紫宮元功  
佩鑿綬濤霍逮茅蔣恩賚徧其友蒸雲雨天下與國儲  
薪樵寒燠應念至五休一无咎今茲穡遺田疇昔星在  
畱材良貢杞梓士樂采苾苾爲眎繩墨程宛若壘篋牖  
作泮陋茅茨選詞賞齋曰復謀委宛藏不許豕亥粗開

哉二酉穴迪後資善誘異時郊甘泉粲粲禮樂負包含  
 月竈月覆幬柳谷柳環拱辰極尊納污寸壤朽峰巒出  
 器車巖穴絕貳負從封禪梁甫筮日吉午酉上公顯位  
 崇朝宿世德守忽聞韶護音察邇詢拊缶下客知說山  
 再拜獻徹帚渤碣萬國頭恆岱左右手冶鑄太華金幹  
 漆衙陽柅器良身手強保大滋長久匈奴田車師未足  
 與砭灸東掇不周粟西挹大宛酒中外恆砥平祝公千  
 期壽

送方存之歸皖廿五韻

魁杓斟元漿眾星耿霄漢賤子箕斗名麗天光亦憐卻  
 緣昏日開得覩垂雲翰正儀瞻巖巖陳義聆侃侃宗風

儀備翁斯道力能捍是時氛靈清海內頌復旦宗袞振

黃鍾

俊良峯相國

河內矢襄贊

李文園尚書

少寇峩豸冠

吳竹如少司寇

正色翊宵旰太行及嵩霍三峯矗雲罕鶴陰和亦高朱

莛美三歎清軒勵介操仲乾陟道岸

興國萬清軒石埭楊仲乾先生

闡聖言紀纂萃學案巍然師鄒魯小哉陋管晏其鄉抗

希堂堅樸俗所憚貌古語質實久若廣陵散生獨切景

行夢寐通問難綽約藐姑人豈與俗子看取辟面壁僧

一線延忍粲頰視桃李姿娒冶三女姒平生麋鹿性相

謁輒愧汗學道苦不勇求羹賴見彈四氣轉素秋羣芳

怨鷓鳴耆舊漸歸林斯別益心怛孤飛慕九皋眾論方

冰炭西瞻皖公山遠引期無憚

念適吳氏長女

陟邱望壻鄉木落北風勁層構麗彤綠綺疏朗明鏡惻  
然念孀孤守拙果正命窮山雖僻左時危盜賊橫南歸  
塗已絕西征貧則病澄潭澹恬波鳶魚共游泳成仁在  
殺身始信夫子聖煌煌忠義錄纂言記從正虎狼異人  
情父子且天性憐汝本無悔垂涕不知竟

湘陰郭孟純

慶

讀書秋樹根圖

七月二十一日

萬慮戰一心術以道義勝縹緲五千卷宇合付包孕郭  
侯靈占瑩珠光照十乘揮斥羣有餘經史盡佳證徽猷  
君子陳妙義古人贈孤詣造其微秋聲澹淡聽吾老排  
世好苦無朔聲應據梧手一編西望羊求徑

說車

斬穀利反輶採輶欲頌典雖經坂九折快行不退轉晴  
晴幸苟安泥淖尙難免何暇履覆轍爲人策偃蹇儒林  
有先生蒲輪辭畎畝高歌思唐虞裁成徧狂狷上數夏  
后璜下及陶氏甌緇衣卽好賢同功已異繭舞愁羊公  
鶴仙亦淮南犬牛且慮緇縻矢豈計貫選漫云苜宿盤  
有時兆三鱣驄馬持斧來焉能顧夏篆風霆起警欵下  
道承英眇出門有折軸僕軫未及展失意歎虺隤路狹  
沙石淺余貧無下澤安步期獨善早年困棧車大圭從  
不琢亡羊有同譏弦韋願交勉

鄰人之虛爲建糧捕分府署者堆積瓦礫其壤七



畝遂成小邱地主不平也聞而記之

開門俯培塿未審積所昉若戴平幘冠取良覆蓋象闢  
然府寺建羨茲甌脫壤大聲擲金石毀折棄陶旒塊圯  
堆瓴甃間柯拋盆盎惟增礮礮狀不勝薜暴響透池勿  
能登絡繹絕異曩蟲豸居之安屏廁民將放窘步昔墟  
落縱目失虛做其基孰自棄非高不可仰事殊理則一  
物大本不兩此嗟糞土穢彼欣庭戶朗腐朽此莫訴階  
級彼取獎暇且悟功修賤勿論直枉爲高必有因如惡  
切勿長九仞由卑升百尺自下上移山在積累躓堙戒  
鹵莽欲換舊面目勿忘斯指掌芳臭致雖殊尺寸道弗  
爽功豈一旦夕懋勉冀吾黨

用涪翁體寄李廣文養賢同年四十韻

筋骨辱塗泥齋鹽思學省秋聲凋梧檟素魄亂藻荇東  
郭濫笙竽南畝儲粟穎自可隱朝市豈必逃箕穎焉知  
金石交皆同土木梗悔未突徙薪墮若瓶羸井言樞失  
斯須禍機烈俄頃本屬肝與鬲誰保首在頸惻然朝夕  
謀豈惟耆欲屏竟廢風雅頌甘求釜庾秉偶接朋舊言  
欣等美難併龍鶩復兆災江郢無完境徑又淵明荒生  
煩孟涂請其生免也枉或予馭其幸盡默內外言況敢  
左右騁日常如子卯食敢問丁丙戒螿懷姬公善養師  
紀涓桃蟲恣後艱木雞失前猛乾乾心百忍兢兢日三  
省未明衣裳偵終年琴書冷如驥羈其足在器覆以皿

言四  
弱難事擾鉏暇可理答答進道喜由貧明幾端賴靜金  
人口知緘玉女志漫逞何期遠道游未能終譽永寇已  
需於泥勢難暇以整脚輓杖莫扶目淤燭徒炳業原土  
作羹名亦地畫餅疎實秦於越誤喜燕說郢敢言託臧  
獲於此保要領附同師德跛贅同當陽瘦乞食同長鋏  
用智同短綆魴鯉同慎出形神同弔影聞同耳寘瑱語  
同喉有鯁憶女成癡駭懷舊益悲哽雖絕雪鴻跡豈厪  
風鶴警里婦煽餘波穿窬亦大青尺布成巨駟半緡若  
大甘呼舟宵渡河借車疾踰嶺前痛不敢思敲枕夜耿  
耿

擬韓昌黎調張籍

午涼方澆春有客來北窗言陣堅嗟峨議圍高崆峒矯  
如蛇赴壑捷若童緣撞大將并溟渤細復收涓瀧若高  
不可企若鬪不肯降發發見矢激淵淵聞鼓鋒炎炎原  
可燎蠶蠶鼎欲扛驪黃騅駉銜枚繫之椿紅紫青白  
朱綰采使之眈自知鞠欲絕不聞金或縱廣武爭項劉  
馬陵走孫龐欲以囊底智壓陣雲黓黓三鼓氣已竭謂  
君無乃隳兩軍士無愁與子回其幢神亭倏斷胄大河  
紛爭艘氣餒霸上弱甘奉璧一雙軍羸達門開自牽羊  
千腔籍誠知呂微願託齊晉邦籍誠箏筑細願隨鐘磬  
縱如培塿比岱若涪涑入江語久日已暮試翦風前釭  
作語付阿買切無足音登

悽悽

悽悽別親愛依依去鄉里背負一破衾驅赴前敵死妻  
女牽裾泣白刃亂揮起十步回首觀已躍秦淮水夜宿  
江沙頭啼聲猶在耳遭逢有天幸前隊盡披靡王師赦  
擄脅薙髮與湔洗投身驃姚營廝養濫青紫絲竹列後  
堂金玉滿前卮葉戲聚淫朋烟燈狎婢子鬼神惡其盈  
示夢戒少止其寤益傲然烏呼何所底

外大父蘇案庵先生

憑高眺九州孰不為俗鄙長嘯若鳳鸞斥鷃豈其偶混  
蹟貪廉閒所耽只文酒米屢貸西江陳鐵駕每枉北斗  
鐵治觀察李士更迎拜若肅古故叟山秀壇坵雄公之  
亭

餘子盡培塿東河數雅吏先生以主簿翁宜居選首何  
以新沐衣不忍受塵垢高明有鬼瞰遂致令龜咎縱虎  
諸後生集矢在耆耆傾家償縣官一旦空萬有瑩然軒  
鏡懸知由族子某鉤析釐故府賢哉仗太守許理直獄  
乃定貲產已負負時有同姓某甲宿族子家其人喜為  
云翁縱之翁傾家代償翁自忘飢寒恩怨不挂口買宅  
既而其人弋獲事乃免驃騎航闢地植花柳惟檢所蓄書失一存八九戢影樊  
籬閒啜醕飮則糗至今繼厚德渭陽賴諸舅

外舅宗錦城先生

先生本豪士走馬城東北酒酣呼其曹百金一博塞得  
意脫帽走繞場眾氣墨理運有乘除失每浮於得十年

計昔資不及數之仇選士鑒既明相攸識尤特謂巧拙  
賢愚質性各有則燕雀必平衡百歲始無忒區區貧富  
見昏禮大蚡蠅知子莫若父有女剛而寒賞子愚魯姿  
來嬪真同德布衣疏食久尺寸守羈勒行路稱梁鴻賢  
名溢鄉國世人競刀錐未慮才不克終焉占反目甚或  
致推劾三復先生言鑄石永弗防

母舅氏蘇振聲先生

書畫解誤人豈必在飲博鷗波與香光亦賴膺顯爵登  
高響愈厲致遠驥尾託蓬纍泥塗中賤不直一噓藝事  
雖工巧誰爲趙牛鐸先生天機靈喜金縷彩錯色暈若  
生植不許姿瘦削穠穉比太真華清立高閣使遇賞鑒

家定謂南田作絀綉多賤日古愛今則薄召邀有故人  
極云錦城樂不爲漸遠鴻願爲紇下雀事後齊得喪去  
者悉溝壑時有召先生游袁浦者始歎先生賢子雲甘  
寂寞臨風遡遺徽操琴舞獨鶴

與客言汪承宗事

秋風振庭柯黃葉落不盡珪月尙未圓流素入欄楯與  
君語疇昔暝坐起悲閔百年談吏治李涂兩京尹執法  
固無私立威亦可矧夫夫臯雖微值其不能忍聞其闕  
虎聲蕭斧伐枯菌一二賓雀徒引避若飛隼况當短簿  
病宿憾豈能眈彼時汗浹背逝將解縲綵翳前御李膺  
吏友畫暇眈蕭然澹臺跡弗怒亦弗賑胡爲今茲戾口

箝步以窘陋室蔽風雨飢寒未顛隕自離清淨緣竿牘  
動裁裁使非賢大夫深恐噦有朕感此生遐心息交敢  
不黽虛堂淨萬相淪茗啖苦筍

天長縣

勞生會有役豈必在爲吏富貴蹈機穽貧賤可適志舌  
耕口足餬貨殖師衛賜奚爲溺宦海俯仰無天地益上  
而損下巧者交征利漚然有不爲此間無位置引疾回  
鄉閭豈定與其事才拙迺意廣姪姪欲自試炙轂弗能  
轉一擲同兒戲賢婦叩九閭上訴敢自棄時官皆枯皁  
冷熱有趨避命不直一錢彼愚人皆智春秋諸大夫先  
王典可記使其援舊章長途只頓轡留此不才身種瓜

豈挂議抑或觸怒深披緇亦其次戀戀冠帶中想以兒  
女累桂膏古至言龔生不垂淚

有感

神虬貴屈信黃鵠告反覆陵谷且推遷日月變寒燠富  
貴觸危機貧賤甘食肉處世材不材聞道乃爲福進退  
有時位見諸飛與伏毫髮失因應破敗速轉軸太極本  
虛靜此德勝龜卜朝爲瑞世麟暮爲幽巖鹿超然虎豹  
叢虞人欲空逐長物厭一瓢孤棲遲三宿高歌臥白雲  
繞屋對修竹誰能比枯皁取悅時人目

贈莫仲武繩孫

黔中三詩人知二可無恨况於邵亭長羣紀塵跡溷期

結元白隣賃廡已成券文拓梁陵碑饌盛吳客飯挂頤  
對細素不覺俗器遠何期愴人琴聞笛起幽怨幸有門  
子賢昕夕續文獻插架堆丹黃蠅頭字踰萬阿大有中  
郎勤業將子勸吾道無津涯篤志無敏鈍詣雖判淺深  
長不論尺寸以故千載下賤愷貴原憲譬如孤竹裔終  
弗儕負販淮南游俠兒張目祇陶頓願子與之伍利刃  
斧枝蔓新浴振其衣行庭止占良清心觀世氛飛鳴功  
斯建迂哉老友言不知師无悶

送孫琴西廉訪三十韻

平生讀儒書萬事一吹呖妄希段泄風閉門甘臥雪何  
期蓬萊仙下交竟折節涓涓溝澮流望洋歎渤碣授我

兩卷詩琳琅罪玉屑麗本賡卿雲讀恐誤雌蜺骨高鵬  
欲騫采暈鯨新掣狃狃節制師盡浴兩甄鐵綴文徧門  
子賈詩及椎結才名翰林公遠覃海外截三天侍桓韋  
四海仰稷契殷憂逮小雅忠奮近臣舌期以一寸心建  
策安阨陞借才例補外安問軾與轍皖公媿高寒雷池  
照清潔好賢值功宗緇衣互欣悅符綰竹使尊篇肆蓼  
莪闕鳳德儀高岡烏臺肅舊列求才涇渭判衡文雲漢  
抉骨宜市馬駿意迺容鳩拙清德聞 紫垣晉秩 詔  
陳禁獨此檇散人依依戀明哲往者失夷吾雖憂台星  
折嗣音吐握誠猶幸倚英傑油幢肅 聖政去我若賜  
玦江東孤寒多誰復肝腸熱豈惟山水志將爲牙弦轍

無人穆公側桂伐甘泉竭愁對短檠青念此已縷絕祝  
公敷 皇猷浩歌爲此別

賀幼誠不波舫二首

年年涉鯨濤轉喜溪澗隘烟霞入膏肓并嫌江九派賀  
侯不波舫久忘龜山廡晴牕自偃仰圭組詎蒂芥疏林  
綴餘翠蕭然展圖畫乃知陸海舟大勝張帆快趁墟檣  
烏集過門白鷗邁幽夢到山桑茲誠極樂界余愛住憑  
溪隔港互漁話

賀幼誠和韻人海日瀟瀾似詭演百派當其極狂恣  
性命等昔芥條然脫簪組身廢心則快石城留我住  
江山總入畫誅茅結舫齋未覺三樞隘池臺帶竹樹  
喜遠西州廡白署不波名謂如諸天界愛君爲我隣  
高蹈年德邁時時策  
杖來要述滄桑話

紫陽評諸賢殊病西河隘不知性分歧判若鴻溝界平  
生枯槁人嬾與簪纓話山林視鐘鼎涇渭本異派譬如  
河淮壩蓄勢壞廬廡西風惡浪中啟之一瀉快矮屋蔽  
風雨疏食羅菁芥糞除清淨心支頤賞書畫超然萬物  
表竟忘日月邁

性識如水源與君略同派平生畏火熱遠之若邊界  
循寄實滄洲豈復知官廡終古與時特邈哉伯夷隘  
傳業古所重安能無蒂芥君說老蚌珠胡爲有嘉話  
斬時曷自奮枯楊生稊等其快光陰川上水百年亦  
易邁還應息眾  
想掩關日讀書

幼誠園中鑿池告成詩來屬和用原韻

柳州論清遊蔽以奧與曠闐闐異郊坳闢地烏能暢所  
貴道者心鉅細泯殊狀萬彙極參差齊之以定向一灣

卽龍湫一邱卽雁宕潦積兩湖通石歧雙星望皎月印  
空明惠風扇浩蕩奚必江河淮長年增惋悵不行亦不  
止孤艇固無妨自性識淺深任器別缶盎谷棲有愚公  
遇斯輒神王在昔滄浪吟其源東流漾願君不波懷落  
帆聽漁唱

兩池未鑿時園林已清曠惜無流動姿趣機終不暢  
梅翁實啟我開鑿指形狀通溝如呂字南北深相向  
得論忽欣喜幽意肯延宕評詁及冬晴兩池俄在望  
平生對江海志所期在浩蕩身世歷險危波濤翻悵  
轉喜對漢汙止水固無妨游或觀介鱗汲可供瓶盎  
梅竹有殊態鷗鳥覺神王開春足水泉風來亦演漾  
主人得所樂俯仰發高唱  
○賀幼誠鑿池告成來詩

有感荅俞生澹生

依人令人賤伏處令人愚況君滄海涯豈少明月珠願

以樗散材歸種荒山隅歲晚斯爲薪倘得供君廚鷓鴣  
雖有求自知毛羽殊仰首謂鵬隼葦苕誠區區狐兔滿  
中原幸可容賤軀

與林生冠山語

久客人自貧相依士自賤枯寂不能忍耳目紛所羨狂  
奔途易窮累求施者倦貴人示冷語刻於絃上箭羣處  
溫如煦此獨四支顛坦途生荆榛僮僕變顏面回思空  
谷中何嘗有冕弁嗟哉羅針盤出處差一綫

題方筱雲秋山同隱圖

儀真方文甸

林棲無競心誅茅有餘適曉泉濯野簌粗糲不遜噍潘  
輿奉遐矚雜芳綴疆場哀鴻滿江泉蕩析嘆中澤手援



古所難誰其登衽席一椽雖云隘求點足朝夕商飈振  
叢薄霜葉尙殷赤長嘯憶醜沈俯視祇嘆嗒陋彼谷飲  
人惟知煮白石

梅翁詩鈔四終

受業外孫吳鑑慶隨校

梅翁詩鈔五

江甯汪士鐸

甥上元吳達重校刊

本年正月兩病幾殆戲書

風寒兩大邦攻我比邾莒反胃哇齋鹽由尻上腰膂毒  
矢紛如林肌肉與亢拒滿堂卽孝慈不代一絲楚幸此  
清淨心未染彈指許內觀十二經設守次第舉山廚薑  
桂在安劉剗諸呂危哉若累丸肝胃互爾汝同託肺肺  
閒門戶勗守禦此次肝胃併病寒也

小園久未闕梅花香爲誰梅言幸君在展我歲寒姿賊  
風伺君隙飲饌爲鳩媒君情誠達觀欲速者嫌遲蔣方  
兩君子蔣文若方伯雄皆無病而終福大難三之赫然示疾痛胡求

言五  
和緩醫聞此再拜謝蒙被省所私俗情本不戀恆幹卽  
可遺惟祈化冷風與梅日追隨

杜門

公子好結客巨細愜所求懷刺欲掃門趨趨懼體柔貧  
牖竹陰入荒隴豆苗修俯仰豈不足百年同一邱

芟樹

天地力盤礴在我惟小園我代造物權枝葉那容繁本  
實宜培溉萌芽乃兒孫乘除理白爾靜者悟無言

偶題

觀物如觀火雖知不能行要須厭眾口迺足平不平東  
風醒園綠微雨濯無聲氣至羣動感幽鳥皆和鳴

聞天津事追感文正公

銛鋒利一割傷手害亦多頑然萬仞石能砥濁流波海  
內論儒行巧拙不同科要須遇順風片帆涉巨河赫赫  
湘鄉公取士賤媿阿推轂眾技彥功業炳羲娥景迂亦  
有人公論終不磨

衰旺

衰旺言其理運氣閒入出愚者刻舟求天無蕭何律損  
益窮毫忽衰譏限月日故紙泥浮言至疏由至密談天  
驗之人叩虛責其實武成取二三是讀五行率

烹野鳧

園垣桃始華山陬梅已標惠風動池魚微雨逐簷鳥午

餐勤庖人失餽勞糾譎庖人退有言是晷本沙曠臭味  
變醯醢漑烹費薪燎如彼嫫媧姿何以貴窈窕室人代  
致詞物理君未了咀嚼雖肥甘芼之亦蘿薦二美既不  
具尹牙皆頭掉曩過蒲塘橋粗糲免餓殍惟求果飢腸  
奚暇辨茶蓼聞言默愧歎斜日上木杪

園莧甫生爲黃沙壓死

天氣噫不平飛沙助祝劄作勢迷東西壓蕤弔天札高  
折柳初稊下沁葭彼茁增長神山三湮澤雲夢八雞啼  
變踞旦鳥跡佚皇頡青青園中蔬非種鋤明察忽以流  
沙平幾同大木拔月盈魄始生物盛理方殺乙乙寸莖  
抽星星兩葉滑譬彼才童牛何辜此轆軋退藏甘屈蠖

伏處遭劄劄敢援天問詞非窺地毛鬚

安隱寺

詭辨誤良士堪輿阻孝友南郊安隱寺富貴骨已朽高  
下若纍棋子孫相比耦月黑鬼車過山僧聞牛吼卓隸  
杳無跡闕閱綠生莠邪說害蒼生郭楊浮桀紂郭尚可  
未減加等楊爲首

又

日月不待人續續機發矢童齷才經過彈指老病死昨  
聞石友逝發函徵銘誄煌煌墓大夫召穆言在耳堪輿  
記班書文已無可指喪葬禮之大一切委賢子紈綺妄  
思貴十事九不理又聞新鬼哭河清渺難埃風鶴苟不

靖居高立營壘百年子孫憂何時期嘉祉莫食雨花齋  
莫飲永甯水中有故人血無復望青紫

落梅

藐姑冰雪姿獨抱上古玉東風惡排擠甘受塗泥辱平  
生幽憂心曳杖尋芳躅徙倚明月中餘香暗斷續謂君  
曠世懷貫拒嚴霜酷元冥不敢犯一旦彫春旭始信傾  
城姝衣不伍眾綠高寒絕近情暄妍陋時俗散髮步山  
椒反璞思顏歎

自哀

兩儀清濁分萬古不復合有如盜酒僧以水盈其榼吾  
拙忘蹇劣純樸不敢雜心期一寸膠湛然清河潔天公

爲之笑口吐不復闔謂如滄海底手造九級塔謂如敖  
倉米采導較侷合蔽在愚與魯檮昧啟噶沓近知懷葛  
風難施秦漢臘相儀必元端整戎必鞅鞞豈容廟堂上  
襪解屨不納吾悔已莫追惟宜三衣衲世人或未知自  
鳴鼓鞞鞞

自勉

榛狃暨赫胥草昧若長夜羲軒夏商周春氣如啖蔗世  
風逮秦漢長養乃炎夏名材混惡木各資雨露罅變革  
非鴻鈞廓清傷氣化口筆微塵微安能高岱華雖期秋  
霜實不忍凱風謝造物方廣大萬彙此假藉太璞固天  
真精明亦其亞羣生慶熙壤只什一狡詐由然與之偕

吾宜師柳下

有感

晚年耽寂靜善惡解禪縛始晤嬰兒情笑啼皆至樂髫  
齡讀經史七竅混沌鑿既壯涉江河辟灌在鋒鏑慎於  
結縞帶幸未營囊橐難進期速退百否不一諾於世固  
冥冥在已求綽綽前年光緒元年築菟裘冬夏借棲託一編  
一茗餘自恨六極弱分卑甘賤貧才微淡飛躍自欣湯  
網魚尚爲華表鶴葦苕既有巢紇干非無雀寄謝惠好  
人天壤本寥廓

飲泉

飲泉必讓水買山須愚山雨美卽交迸擇處無過閒味

苦饒餘樂境逆宜好顏初九位在下安危分此關

題胡雲林飛雲山授經圖

靈山鬱奇秀徑曲松風長雕鏤出石竇暗滴紅泉香熙  
崖得幽賞蘭谷翼平岡頤意有先民儁父罕車張抗心  
闡傳注宋元皆秕糠昔聞不其下書帶紛青蒼商逸纂  
師志盡發璠璣光迄今通德門高並鸞鳳翔願言二三  
子肱篋傾寶藏無使千秋後北海揚孤芳

周龍鼓

榭葉鳴虛窗茅簷鳥驚拂或投龍鼓銘歲久紙痕駮文  
云惟元年格廟敬勿勿在雍本岐周文人告穆洵卽位  
冊佑龍史大宣綸綽有司家令莊執藝百工舉宰忽史

闕文姜氏衣定緇赤烏概纒絢元袞略裳芾旅休誠丕  
顯拜稽俞無拂汝其敬厥事外內慎冥眴麋壽蘄萬年  
中庭拜而趨斯銘避語甯鉗口氣欲鬱古帖字叢殘今  
文訓詰詘薛氏釋未明快想利劍刺粵宋宣和來好古  
士盡掘魯壺與紀廡贗鼎亦髣髴虎賁似中郎帝釋混  
文佛范模蠟委曲鏤以刀劑刷篆倣蚯蚓折鮮戒蜉蝣  
掘剝蝕摹蝦蟆屈信倣蝓蠅灌辟沃滄醯時引炭火熨  
狐埋復狐搯朱綠發也歎貴人惟貴耳矜子產博物百  
金擲不惜載之閉篋第誰知非嘉卉高原豐草芴此敲  
將毋同願君棄如芴

般倅

般倅享巧名萬古未見迹大匠提規矩羣知悉受役飛  
車來奇肱創制盪魂魄辟如乘氣球未能供置驛在物  
徒虛夸於道貴實積吾謂西王桃遠愧后稷麥盛名刻  
覈多毋爲後人惜

張鳳山母唐太孺人盟心古井圖

古人有賢母惟以敬姜名翳彼世族富兼當量宇平內  
朝勞逸戒外傳寵褒榮令德今猶昔危時寇與兵少君  
親井冽孟里響機聲旣幸佳兒孝宜蒙苦節旌衣繆承  
色笑貨殖寓通明述德須惇史循陔比雅笙

跛牂

上駟儲良驥郊垌有跛牂荒陂草衰腐新棧芻豆香西

風邊塵動作奏上建章遼海五更月玉門千帳霜大軍  
忽改道驥足走欲僵跛牂飲澗阿敢言念遐方但祝驥  
日強俾予安舍藏

丁丑正月紀事

緣習已削跡增惡猶孤懸戚郇鮮深契正坐性染偏一  
瞑息羣有寒燈燼不然倚枕念過誤緇衣無由湔

讀書七十年所學只知恥自謀頗不工安能及餘子昨

昔夢就傅夏楚懼及已河沛性各異波豈爲風起

余六齡就

孰今七十  
六年矣

求鏡磨此磚歲月忽偃蹇平生學道心功在不退轉綆  
短致瓶羸瘠輕狎灘淺非爭桃李妍春風來可免

外物野馬馳道眼不挂念六淫交七情視我爲邸店續  
風騷亦淫準易元本僭坐臥故書堆冠匱在反玷

平生

平生讀儒書質拙氣復弱此事須時命咎在不耕穫匡  
時急管韓何處著閩洛言動思古人古人豈復作矢激  
力逾猛災恐及琴鶴端筴詹尹卜棲身壺公藥抱甕漢  
陰姿俱爲紇干雀出處宜早年懷安眞鑄錯

有感

氣必足帥志力必足舉事德必足忠勤才必足副意更  
能際遇佳巍然成偉器不農復不商巧言工文字諧伴  
下儕優適用不如吏坐失駒隙時強爭蠅頭利蝸蠹其

齋集正士所鄙棄宜其宋虞閒日以儒為戲歸德各邑優扮在陳

絕糧子路想及樊遲農圃孔子云事已如此不如尋遠老伯討蒸餈食

上厲伯符都轉王戊

貧於道非病適軸齒可沒天運尼陽九劫灰扇駱粵躡  
躑躅層巘微服甘采蕨身外一蒯緱閉門恥干謁嘉召  
迫師命沂江依節鉞狃狃宮太保求賢屢握髮累人只  
片肝封侯知無骨濫竽丹鉛閒寒氈容樸訥夙慕華嶽  
襄紫蒼苞燕碣大河戒南北渾涵走澥渤借車就壻鄉  
欲玩長安月紅巾肆繹騷燔燧照井伐旅食郎官湖土  
突薪芻竭仁公閔淹久脯牽再三發軔饑客舍藥對使  
情艱脆昔人處患難隆窳矩不越老氏蓬藁行詎云為

糠粒大賢闔悌懷運量及獮獫譬諸秦宗雲膚寸合翠  
峯滂沱所霑施薺芑興也勃磴磴匹夫節未足測治習  
詩為勞者歌聊自箴吾闕

題雲東逸史書張伯雨詩文冊為翁鐵梅長森作  
近人汲古深疏泉及方外辟彼鰲鯨微作佩附革帶蘇  
門誠鸞嘯羅浮云蟬蛻有如拓金石片瓦等海貝老友  
明眼人奮起肆沙汰存宋兩黃冠餘子皆自鄙吾謂郭  
忠謙張忠後句曲其截膾高蹤泥巖泉徹屣視冠蓋逸情  
餐芝草不必問松檜惜其景介邱裏足陟東秦儒術既  
修阻種蘭或采艾嘉君思古心喟然奏虛籟

題張楚寶竹居圖



徵文富益富汲古深愈深金圭質既美追琢資賦箴抑  
先肅言動賓筵聯素襟瑟僊風人旨弗諠賢侯心丹青  
寓至理猗菁蔚平林烟雲滌塵濁鸞鶴多妙音卓然有  
斐譽仰若鵠千尋

悔翁詩鈔五

終

受業外孫吳鏞慶隨校

悔翁詩鈔六

江甯汪士鐸

甥上元吳達重校刊

顧君彥馳馬程眉生作圖

丁酉三月

君彥馳馬馬絕塵眉生試馬馬逡巡林花山草四披拂  
玉鞭不動騎嘶春平生見馬乃卻步對君馭馬思馭人  
指揮誰能役羣僑馳驟何必齊方歎馴者翦拂供上駟  
健者鞭策充兩甄驥足庶不淹百里長材短馭馬亦嗔  
觀君此圖發長想似聞馬語爲悲辛秋風伏櫪三十載  
仰秣坐困鹽車輪方今燕臺正市駿豈重鴛駘遺騏驎  
嗚乎豈重鴛駘遺騏驎

題湯雨生移山圖

詩六

銅鼓軒

案頭忽墜青芙蓉筆硯髣髴烟雲封燕磯仙掌數千里  
頃刻聚列三高峯山木偃蹇偶示象巧匠觸手斤橫縱  
仇池九華豈足數石骨百尺苔花穠昔聞夸娥最有力  
太行背負朔與雍江南宣歙苦地狹峯巒疊疊憂三農  
安得二子好身手散置海外黃河衝縷隄蓋壩紆謁者  
守在四夷爲金墉吾生溝斷自其分南北蛾綠會羅胸  
移山未能且讀書赤日杲杲松陰重

王鞏硯

坡翁往日知徐州定國載酒從翁遊菊花滿地作重九  
新詩直欲鳴虞球世家年少愛文采此氣已足吞黃樓  
晚坐翁黨謫嶺外賓州瘴黑如雲稠甘心蛇虺不少屈

節義更可師千秋忽出外祖所遺硯乞翁作銘書繆虬  
文懿和鼓史所誚讚以壽考無他褒古人一字慎假借  
匪如毫髮如山邱流傳七百有餘載寶氣夜夜纏牽牛  
清虛堂圯幾滄海想見染翰歌且謳君從何處得此石  
其美突過鐐若鏐竹窗曲室晝窈窕坐客傳視風颼颼  
澄澄寒碧目精奪不敢響揚惟雙鉤趙璧鄴玦詎有價  
裝以桂櫝吳綾紉嗚乎鞏之婦翁翁所重邊防兵事尤  
能籌太乙仙人肯傳壻定有善頌煩彫鏤

岳武穆王小印

玉章十韻 以下三詩丙  
午三月初四代周小農作

漁翁釣月滄江濱鐵網一夜生珠塵老蛟驚起不敢宿  
風雷震地遺貞珉鄂王化碧已千載朱紋小印留嶙峋

漢家十世有光武偏安半壁何足珍黃龍痛飲已畫餅  
金牌敦促由權臣拔髯雪窖倘遂志菹醢含笑從前人  
兩河未復忠義泣天子自壞長城闔幽蘭堂上新鬼哭  
弓刀想像馳騏驎摩挲古篆若球璧鈴尾曾見飛書頻  
願君寶藏眠萬世岳侯忠孝無與鄰嗚乎岳侯忠孝誰  
與鄰

段太尉小印

銅章十韻

涇原叛卒如犬羊朱泚驅之如豺狼乘輿駱谷孤鳳凰  
三省文吏百鳥翔幽州河北同鴟張藩鎮列視虎之偃  
西平北平尺蠖藏存者令言與懷光太尉突起何觥觥  
僞與崔氏隨趨踰飛檄倒印追豹槍困龍始得西南行

倏焉擊賊攄剛腸姦人褫魄什且僵四座貽愕頭欲搶  
惜無繼者天戈長鬼雄夜夜哭國殤百神守護茲銅章  
未知象笏留何方煩君起視牛斗旁

周廣順癸丑六月馬良造象十一韻

士不得志善其身理氣性命爲家珍釋家如來儒道學  
不惜文字言化人莊嚴慈善備妙相瞻拜清淨空六塵  
流離兵燹慘五季渠略掘閱悲斯民河洛充鄆戰爭急  
夕爲白骨朝儒巾不能彎弓效驅掃田園守拙成飛鱗  
愚心乞憐到象教鑄金那惜米指困烏知三藏只潔己  
獅子龍象皆貪嗔亦若濂洛與關閩迂談敢薄管與申  
易有太極增無極妄誕不異西方神今人吠聲競闢佛

三復吾語請引伸

晉元康元年甄歌

以下五首代周小農題

金行扇逆驟御天此座可惜還可憐三葉締構二葉敗  
商受元子同拘牽夕陽亭上酒未醒南風烈烈噓以烟  
干霄虐焰竈易煬長樂焚剝承華顛慈孫聰慧竟何在  
許昌尸氣泉鳩纏荆花次第化棘刺若盧獄藉金墉堅  
成都長沙互傾覆城門災及池魚賢神州板蕩固夷甫  
誰其萌檠甲圻前固執古訓治叔季畫衣詎使苗民遷  
嗚呼此甄洛陽一片土應憶衛瓘老奴之言炳幾先

鄂州興唐寺天祐二年鐘拓本歌

并序

鄂州城北鳳凰山興唐寺有鐘銘稱天祐二年三

月十五日鑄此楊行密初得鄂州日也勒官者有  
陳知新楊琮姓名楊行事未詳陳則岳州刺史瀏  
陽之敗馬殷欲活之不屈而死嗚乎可謂賢矣夫  
銜須授命者委贄之恆軌斷頭不屈者邊將之大  
節是以運替三五心泯億萬常山之舌可割先軫  
之元幸歸祠兒祀夫鬼雄國殤式於肉食若夫地  
分列國史紀雜臣茫茫禹跡無非缺甌之士巍巍  
元首有同弈棋之子宰臣有奉璽之典瀛王獲苴  
茅之賜教忠無術易名蓋闕如知新者可以風矣  
因觀拓文增此感喟乃爲歌以紀之

土氣如墨如烟熏瀏陽營前壓壞雲蟲沙盡化猿鶴死

刺史豈是降將軍長刀遮門雪皚皚侍者絳幘禡首纒  
屠肝劘目炙肉醢見之膽落驚楚氛帳前皮閣五花燦  
纍纍印鏤黃金紋紫袍魚袋象牙笏油幢檠戟兼從紛  
射鈎斬祛有故實錫爾好爵圖爾勳刺史瞑目皆盡裂  
丈夫豈備斧與斤仰面不肯負楊氏天旣亡我將何云  
鐵槍豹皮史所載與爾異地揚芳芬瓜分十國少甯晷  
褒忠賜諡良無聞華鐘鏗鏗託紺宇姓名階級詳螭文  
摩娑翠墨整冠拜霜氣忽失紅日曛願拓萬本傳萬世  
謬語一洗臣擇君

程讓室徵君磬石歌

秦灰已燼更戰焚古器蕩如深秋蟲泗濱樂石誰復覩

二千載有程徵君靈谿選材良匠鑿法算盡掃前賢文  
請以九九術爲君通遺聞鄭君取譬三角形虛處邊綫  
橫如雲短股長鼓兩腰判侈舛鈍銳殊難分倨句之度  
一矩半對角之底裁霜斤觸弦二字卽圖解精確久式  
弟子員徵君橫斜記發斂幾疑治絲無乃棼不知直角  
譬若矩百卅五度圖辛勤若以求通弦引箭至邊如所  
云試以準象限進退等度除紛紜治經詎必改師說非  
此未足張吾軍鄭求垂綫程六宗二五與十殊自欣不  
爲置譯通彼此春蠶自縛徒紛紛

秦定秦劒歌

忠武治蜀廿一年西南功烈稱哀然訶陵白狗靖烽火

言一  
五  
奎章紀績豐碑鐫兵鏤定秦本桃氏微陸暢夫禍必延  
在廷惜無博古士刀劍有錄緡陳編丞相臣斯奉勅篆  
蛟螭盤繞離重淵古文二禾或並植如艸作舜與爲龔  
北祇出銅鑄利器斷簡猶記秦三年劍形圻鄂證典瑞  
兩刃一綫如衣緣惜哉傳緒僅二世太阿倒持君無權  
五星灑上一夕聚佳讖於此非虛懸流傳爾日二千載  
青綠煥若春山烟南康之刀儻可見藏之寶匣當如玉  
軫調雙弦

胡梅林少保銅鼓歌

君不見文淵親征徵側功鑄銅爲柱高插空又不見武  
侯五月渡瀘水蠻洞箐深鼓聲死古人海上論奇勳治

銅爲器前所聞梅林少保方秉鉞屏障東南鎮甌越胸  
中全貯渤海形島嶼縱橫如一髮閒謀奇策窮鬼神倭  
島鯨鯢皆失窟先謀後戰部署定若解錦條飛俊鷁海  
螺吹徹霜月高蝴蝶長蛇漫衝突龕山舟山指揮靜徐  
海王直逡巡歿獲茲銅鼓助軍威精氣熊熊動參伐四  
鼉蟠結填波臣怪蛟妖龍掃以孛百年父老猶謳思清  
夜扁舟拾海月騎箕一去遺器存景鐘鏗鏗音未歇土  
花蝕翠胭旨紅條侯之戈魏公笏前年江浙走盧循小  
草山中徒咄咄雷明布鼓且不鳴嗚乎銅鼓兮終蕪沒

題九子圖

一兒玉立持蓮燈一兒背引鳩車繩長者負幼播鼗笑

兩昆擁弟從地升旁有雙珠魚隊行或劈若榴或麾肱  
肩隨伯仲競英爽初生之犢鳶肩騰異時分授九維立  
定見吾道光采增我聞多男昔爲累元凱之後南宮登  
潁川荀氏已不逮餘者碌碌何由稱畫工弄筆作媒祝  
調鉛敷粉如雲蒸蜜梅花下灌園客看山獨倚扶老藤  
豚犬猶靳况騏驥添丁何日期代興眼前得此聊快意  
南窗呵退毫端冰願君更寫九子母瘵手瑟縮如霜蠅

宋漫堂中丞像

尙書極慕眉山翁畫像列侍懷高風文章政事隔異代  
平生遭遇殊窮通東坡坎軻挂黨籍瓊崖幾化三秋柏  
晚乞常州已可憐空於翰墨瞻陳迹尙書奮起千牛中

兩江開府傳豐功簿書期會偶支議屢勞

聖主爲

優容晚築西陂作安宅

奎章親賜連城璧青宮師

保晉

殊恩

一德感孚投水石泝泝封侯事不

同拜公遺像憶文忠尙教李廣逢高帝萬戶侯封未足  
雄

周史頌鼎和程子威農部

程侯示我史頌鼎古色斑斕齊翠蜃薦思魚腊味馨香  
刻謝饗饗象菌蠹銘詞六十有二字五月甲子篆秋蚓  
吉金作彝其萬年王在宗周朝庶尹左史右史想載筆  
元衣元冠知畢袵成周有役命休父時維司馬具干盾  
羽里地望絕孤證餘事欲釋謝不敏如鉗在口讀詰屈

徒賞銀鉤比驚隼無專已伴焦山青神物殊方相接軫  
多公索我寶鼎詩無奈文通才已盡

延熹磚 二年八月誅梁冀之月也

火井欲燼當延熹腐鼠竊國魁柄移五侯老謀一夕定  
屠若羊豕無逶迤豈伊絀權位將軍跋扈猶當時豈帝  
果英武孝桓闇弱中人姿始知大勇在能斷需者事賊  
無遲遲願銘甄官置座右時若發機慎爾爲

宋距末 代周小農題

故書雅記胡無弓未聞睢陽堪作式誰其舳者比鐵胎  
弭鑄精金繫徽纆玉珪蜃珖繹古訓作器能銘大夫職  
銘曰愕作證浚長互易偏旁左右翼前無肉譜世本亡

姓氏浸微稽莫得鉅黍苦憶蘭陵書鉅距無分祖此刻  
金銀漫記淮南王淇衛良材曾用飾同聲訓應云簫指  
假借字還成或國商之代宋禮從朔福之爲釐義可則  
官無若盧主者誰考有豪人上其食數千年後玩金銑  
飲羽呂梁思勁力六雙飛鳥射不能空對商邱三太息

嘆喟

大爲虺蛇細蠶蠱內爲痕蠱外瘡疥豺虎不忍自食子  
君今所行豺虎怪骨瘠如齒髓可吸膚剝入喉血亦嘔  
陷胃裂腹力未能傾卵覆巢聊取快有司斷案不斷離  
不麗丹書爲世戒世途豈果荆棘多自辟康莊入險隘  
煌煌熒惑爲小兒強取河流分別派皇朝宙合皆一家



天下山川有兩界平時已覺倫常乖此後深憂禮俗壞  
夜郎自大在專欲蝮蚌相爭將兩敗藥石拯救莫內顧  
禍變萌芽猶狡獪昨宵鬼伯嘯在梁絰結余心終不解  
勸君沮君如君何斗室默然長嘆喟吉甫敬通得此三  
更恐因君服刑械

題雁足燈 代周小農

燿火欲燼天無風祠官齋宿甘泉宮華枝夜照九微豔  
銜璧金釭如血紅首山辯銅丞掾在陽烏蹠足殊翁采  
灌辟晶瑩出尙方蜃膏百斛來東海絳蠟休矜燭遠荒  
銅盤無焰認明璫帛書望斷琵琶澀獵火熒熒泣曉霜  
儼李義山韓碑用原韻

過江文體逞媚姿俳儷青紅列娥羲昌黎健筆起八代  
上揖遷固爲等夷元濟桀驚肆蛇豕相臣兆應非熊羆  
山東河北多跋扈視此節度爲指麾肅代以來勢積重  
仰仗廟略爲維持師武臣力縱足取發蹤指使由鼓旗  
春秋之義重劉單餘公侯伯以次隨漢高元功首蕭相  
絳灌雖勇徒如貔公文本此遵國體敘次謹嚴無可訾  
大書深刻耀四遠兒女忽進萋菲辭翰林文章苦卑薄  
風雲月露徒爾爲此碑贈炙徧婦孺宰輔下達於有司  
雒誦讚嘆得未有或手畫肚或支頤文章駢語比優孟  
兒亦偶合神則離追蹤典誥去益遠童謠婦諺於風詩  
稽古官有大著作雍容珥筆趨彤墀商皇纖細各有以

制誥典冊碣與碑廟堂偏聽信閨闈遂令蚯蚓爲蛟螭  
始知雲臺遺馬援東京天子真無私驅策二八籠雄傑  
大開明堂坐以治憲宗遠計不及此股肱何由攄心脾  
承宗師道尙叛逆皇甫承瓘罪奚辭蜀夏雖削鎮海謐  
元和治究非雍熙後年晉國并罷相朋黨擠排呼相追  
唐社自此亦不振賢臣往日徒胼胝天下強弱視主德  
嗚呼此碑改作其始基

讀吳梅村集卽效其體 代鄴水

烟波無際婁東水中有才人從此起書多袁豹已淵深  
詩比延之尤豔綺早歲聲名尺五天巍科甲選領羣仙  
春遊鞭拂千門柳晚對光分御坐蓮前朝故事貽謀淺

詞臣卽預宣麻選同時幾輩盡廷推虞山躁競烏程褊  
先生恬退冠官僚牛李卿門黨禍消驚聞福祿方傳蓋  
俄恨蒼舒賦大招黑山飛燕蹂秦蜀延陵獨相於陵辱  
哀蟬落葉慘君王水火依然鬧朝局天荒地老慶

龍飛江左三家往事非秩宗清望推紅豆總憲高標說  
合肥使貪使詐 謨丕顯老臣絡繹來京輦雄辯公

然比魏徵歸田終自悲馮衍一封 鳳詔下丹除頭

白師門問起居旣無令伯陳情表復少西江卻聘書橋  
門壁水波如鏡雍容冠佩諸生迎幸無憔悴舊宮人能  
識前朝沈家令黍離麥秀淚霑襟滿目滄桑感獨深盡  
將剩水殘山意譜入清商變徵音龔生竟被虛名誤膏

煎香熏錯空鑄腰圍減盡究何如凝碧猶留斷腸句誓  
焚妻子媿要離故友相逢服半緇玉京入道王郎老誰  
解開天數首詩

代題于蓮亭耆老會圖

門人王蔚中爲作圖卽爲題之

驕陽色作珊瑚紅名園忽現青山中入門修竹徑屈曲  
芰荷香散華堂風主人置酒召耆舊鬚髮盡與商山同  
陳叟矍鑠九十五墨瀋八紙和紙融崔侯淋漓寫水石  
馬丈冲邈鳴絲桐將軍儒者語矜慎詩驂蜚鳳嗤雕蟲  
餘緒舊德傳賢雋欲贊才媿文通窮因圖冠帶記盛事  
絹素雖狹精神通江湖魏闕各異趣或如鳴鶴如冥鴻  
商彝夏鼎壽者相寸莛敢叩黃鍾宮洛賢往事自千古

代興試告司馬公四山點首相贊嘆皎皎月出瀛洲東

同人有談善馬者感賦

阿誰畫此天駟姿蘭筋竹耳真權奇長安玉門旦夕至  
想見驥首迎風嘶驂騶駟尙下乘駑駘鹿鹿徒奔馳  
一時牧阜競歎賞安得駿足生同時蒲桃苜蓿那敢惜  
飾以珠絡黃金羈繫余昔覩蓬萊仗金鞍色映端門象  
太僕委蛇授玉鞭天街瑞露凝仙掌緩步能教萬騎追  
當風不見纖塵上傾耳惟聞蹴踏聲星回電轉隨趨嚮  
侍衛諸侯策且奔魚鑰森沈開軼蕩偉革垂垂法駕歸  
觚稜曉射微垣榜俯視鹽車困辱身北風不盡馳驅想  
衰老誰憐伏櫪軀曾蒙伯樂譽名駒長鳴尙仰圉人秣

御幸平生略識塗

卽鹿

人人共卽原上鹿又懼山中有睡虎虎亦欲張北山羅  
又欲析薪無柯斧大江橫橫晝夜流聲沙灘日以長江  
水不清時無趙張涅白莫明高城有狐社有鼠漫說知  
情予與汝簾前燕子縱辭巢鸚鵡分明學儂語

題黃節婦詩

無夫身死誰奉姑無子身死誰嗣夫無姑身死誰撫孤  
車輪腹內九回轉妾心自深海自淺羊燈無焰三更寒  
妾夫治命爲其難姑喜舍飴子入泮外人自歡妾自歎  
事姑姑有喜笑聲教子子成庠序名夫身則死心如生

妾身早死孰重輕

送劉香翁南歸

官卑不令要人喜官窮不飲盜泉水劉侯崛起古所無  
紛紛乞憐笑餘子我初識君閭閻中結交乃在緩輿里  
閭閻氣概火騰上叱咤所加盡披靡老謀深識鬼神驚  
豈止斬蛟刺犀兕魏徵娥媚人未知徒見蒼鷹掣鞵起  
彭城十月黃河水賃廡支牀息行李苜蓿未發臣朔饑  
幸有侯芭從杖履天下英雄惟使君謂左清石酌酒相邀澆  
塊壘已看壯氣凌雲霄更讀新詩豔羅綺弄丸承螭遜  
奇巧十決十盪驂騷耳我生迂疎甘避舍况踰長淮橘  
化枳蒼茫身世足悲歎擊筑有時欲變徵感君傾耳賞

巴人許以熱腸待知己  
篝燈夜話雪初消  
北斗壓簷冰墮  
祀卽今拂袖歸江東  
仍取呂梁石礪齒  
冶城把袂尙經年  
日夕春波望雙鯉

鳥言

漸達爲儀雁飾羔折衝  
萬里鷹解條否則清  
唳聞九皋賢君自攬  
六翮毛渴日玩歲皆  
伯勞關河冷落將翔  
翹提壺無時寒欲號  
坐使舉室哀鴻噉濟  
上始營鸚鵡巢爨  
饑舖子河可淘綢繆  
隔戶安能高鳥以意  
對音嘈嘈惜君不早  
求其曹

嬋娟

街南街北爆竹烟  
明珠朱提堆江船  
少年老子百十輩  
競飾車馬迎嬋娟  
廿四橋月竹西吹  
富實突過乾嘉前  
淫朋招邀作風氣  
鋪錦斛酒迷地天  
田夫僅餘麥三石  
亦裁紈素裝花鈿  
家家作伎唱豔曲  
柔聲曼氣相蟬聯  
嗚乎築高堰導淮  
水爲裏下河恤田  
里乃生妖妓害齊  
民不如聽向鯨波  
死

寄劭堂

安于嚴酷治石邑  
史舉苛刻爲監門  
賢者救時懲寬緩  
不仁者遠方見恩  
順風揚帆舟易覆  
羊腸九折車不翻  
禍福倚伏在敬怠  
願君三復丹書言

又

東坡說道髯無著  
慧可求法心能安  
君求十事十皆理

恐君寢饋愈艱難市虎有言貴自反黃門生子真譏彈  
善書所慮掣其肘不慮羊欣能闇干

禽言四首

姑姑苦姑姑苦良人死兵舅死虎妾子又化長城土高  
田苗枯赤日午妾身雖在竟何補姑姑苦

又

姑惡姑惡教妾夜春朝力作穰覈不飽衣袖薄鄰姑勸  
我姑尙仁縣官催租乃殺人

又

懸布袴縣中開徵解藩庫欲前致詞里長怒汝何等民  
衣如故脫布袴脫布袴質錢取酒洗杯箸

又

兒女已死妻已嫁里無人烟行旅怕荒田骨堆不取價  
難民糾錢將一掛燒紙奠酒尙有餘秤肉喫罷秤肉喫  
罷

蔣文若刺史七寶山焚妖祠歌

使君大勇高成荆火弓射神神惕驚况乃妖巫惑愚婦  
荒叢夜伏狐鳴鳴楚俗好鬼重禱禱裏糝酒傾州城  
張旗關食受書法虺蜴弗斬蛇縱橫公率所屬旦掩至  
盡案姦利區重輕騰空烈焰燎根楹七寶山赭何雕甍  
揆剔巖穴驅罔兩快若溽暑西風生腐儒咋舌俗吏睜  
如舖乳虎醺長鱷君不見西門豹鄴城三老謹受教又

不見狄梁公憤王不敢留其宮睢陽繼之治五通正氣  
焜耀爲祝融其振作志爲烈風烜赫所照遠近同小兒  
之靈辟其鋒而况長林館轄山南東不芟苞枿民血紅  
江波晝靜可高枕賓岷拍手歌公功

送黎伯庸之任唐縣州判

虛堂葉墜驚西風聞君奉檄之漢東義陽平林歲防勦  
跨馬定可成戎功憶昨高齋聚耆艾德器淵粹齊華崧  
匏尊茗瓊臭味合新詩宛宛垂長虹涼秋別我執手版  
急裝縛綺彎瑀弓仁者有勇聖所謂溝壘那與耳目同  
用兵不過拊民善奇正互發源無窮策勳歸來肘金印  
開樽應許延禿翁儲墨一斗敘方略日望捷報雙騎紅

建德縣東陽橋古木

古木壽者數百年柯條凋盡霜皮斑昂首塵外不可屈  
俯視萬樹柔且孱風饕雪虐兀不動併葉檠蘚皆從刪  
嬾閱陵谷斂精采剩有靈氣宵往還明堂太廟卜隆棟  
訐謨袞冕趨清班或爲蒙童涉江海載茲壯士康時艱  
僦輸弗作匠石逝良材衰朽儕茅菅暫停征轡一流盼  
野僧掃紛開松關煙蘿風篠媚空翠猗儻無知宜朱顏  
飽飯滅燭供小憩夢見社櫟驚我頑謂大神力辟世法  
資持舊律非南山澗河雲水足受用子所頌禱同誇訕  
質明再拜謝不敏輪囷千尺難躋攀擔簦陟嶺違千里  
望君猶立空山閒

烟江

烟江渺渺無風波  
晴晴雨雨鳧雁多  
兩忘愛憎是漁父  
醉傍沙汀弄柔艣  
飛鳴食宿性各殊  
莫問紛紛門與戶  
文者粉飾誠篤行  
皎然虛實可指名  
內藏者欲外莊語  
三尺童子能與爭  
狐兔有情巧相助  
鷹犬甘心就烹去  
狐兔猶大小有蠹  
何況蛛絲黏落絮

明月皎皎動魂魄  
魄月下誰何詐行客  
羊烹而食謂白石  
鼠腊在懷稱拱璧  
階下蒼蠅冠赤幘  
立身污穢亂黑白  
竊脂斲木社公知  
代向廟前賄五百  
月光雖皎無如何  
疾駕濃雲去無跡

少年射虎守平岡  
壯歲驅鱷吏潮陽  
晚來有鵬止坐旁

氣衰怪鳥與頡頏  
靈龜曳尾泥中去  
藏骨潛淵最深處  
元緒饒舌莫告知  
好伍魚鰕自容豫

對鏡美人

菱花四出光溶溶  
美人妝成生芙蓉  
微顰淺笑千萬態  
嬌烟浥露無春冬  
水精簾下驚郎見  
不見妾心見妾面  
妾心如鐵郎不知  
鏡中只賞芙蓉精

春江

春江初碧無微波  
桂楫侍女工吳歌  
投瓊挾瑟雜觴笑  
君今不行奈君何  
秋汛壞隄浪花惡  
長年縮手颶風作  
破帆無柁沂高堰  
不敢諫君恐君錯

勸君樹棗莫樹棘  
勸君買心莫買色  
勸君有目辨朱墨



勸君有心無苛刻觀君之行爲太息恐君緩急不得力  
荆棘埋駝不若坦塗國色面柔預卜沼吳忠佞不辨失  
明月珠怨報仇復爲梟爲狐秋水時至廢揭厲買得敝  
舟期共濟衣裯日戒猶懼難欲下瞿塘恐非計

戈矛刺人人立死多言傷人貫心裏貫多貫少兩自知  
他日請念無彼此施者快意受者難大暑喝人心已寒  
世事侷得亦侷失華屋閔人如置驛坐君牀上鳴君琴  
彼所報君過此日

逝者如川不復回良時易過豈再來君據要津荷恩寵  
樹德樹怨君早裁有女伶俜惜不嫁辟纒龜手明時下  
恐君傳燭照天紅壁隙餘光渠不借一貧一富人解分

同里同墻同此夜願君舉燭禮比鄰天道乘除互冬夏

鏡

秦鏡照膽無纖塵不能見垣一方人千四百縣懸萬戶  
安能徧照施陽春至人心鏡照比屋人人時時異歌哭  
只分黑白辨妍媸不照胭脂與羅縠

斗杓

君今爲吏香案旁斗杓夜斲明霞漿麟脯龍醢麻姑觴  
雙成綠華聲伎張二八列侍暎清揚投瓊傳鈎雜媧簧  
長樂無極未渠央帝勅雷霆收禍殃飛電照壑驅阿香  
南箕拔舌蛟走僵太白熒惑闇無光伍伯收魂付天狼  
三槃瑣瑣逢雨霜旭日賓寅明以昌賤妾託紡居陋鄉

敝袴苦酒爲君藏恐君倉卒無姬姜仍返故廬鋪糟糠

說劍效后山

歐冶作劍空今古太乙下觀配龍虎世人貴耳未目見  
絕壑空山臥塵土誰家良冶鳴江東陰陽爲炭裝雷公  
百千灌辟鵝膏拭亦夸夜氣騰長虹我幸兩劍不相遇  
遇之毀譽烏能公要當閱世飽歲月毋爭利鈍今人胸

悔翁詩鈔六

終

受業外孫吳鍾慶隨校

悔翁詩鈔七

江甯汪士鐸

鍾山龍神廟

老龍天矯不受韉奮鬣西飲潮溝水饑涎濺地化青溪  
噴薄明珠數十里掉頭昂作獅子蹲氣壓瘦蛟眠不起  
脊脇散蘊青芙蓉上貫斗牛照蒼紫邇來渴睡空回盤  
松柏零零雲烟寒帝賜北湖洗鱗甲喚作霖雨蘇江干  
雷公砰彭電母走甘澍旣霑徧九有華堂高敞老龍歸  
之而淋漓醉椒酒

菰蒲

西風作怒掀菰蒲烏米委地青眠湖江斐過之若不忍

散給萬點明月珠小舟低昂傾復起打槳扣舷無生理  
舟中公子換羅衣密約歌人緩緩歸醉餘夢是黑蝴蝶  
仍向菰蒲深處飛

有感

西風不肯寬愁心寒威稜稜生秋衾昏黃落月淡屏幃  
百蟲爲我高低吟高冠珊瑚位金紫無救兒女皆橫死  
富貴猶思骨肉同況我貧賤窮獨翁

有感

帝饗九夏氏兩楹羅十一鼎肆飪烹篚元纖纒絮以輕  
設醬醢糟稻醴清樂作階下護韶醜賓升醞酢大禮成  
有徒實繁冠朱纓麾之不去來營營交臂斂手趨和羹

吹咀姑嘬腹彭亨腐腥朽香羣蛆生污我庭實涅如鯨  
拔劍驅之仰集蕘黠者上下左右縈使人耳聾奪目睛  
知竭能索心怦怦帝醉不怒倦朝盈風霜有權不與爭  
小儒之言徒硜硜譖女女豈能歸誠君不見雷公轟轟  
電目偵

曉日

瞳矓霽色蒸朝霞曉日初上羲和車六龍天矯不易得  
欲市驟裏扶桑涯黃金萬斤珠百斗貪夫豔心知炙手  
圍人自媿九方甄八駿雖遙今亦有

臣里

稽古未考青霞君識字不辨龍虎文大道何在在虛靜

驅雷馭電徒紛紛臣里窈窕蘭揚芬禱祀禳祝夙所聞  
絮精膏沐婆律熏以妖召妖愴蒿焄風來颯然羊之獫  
丹朱馮身氣細緼楚歌楚舞樂其羣其雄歸來怒憤憤  
貌是呱呱棄諸邛神佻羽化椒亦焚剩有雞犬難乘雲

庭前

庭前數十青珊瑚涼颺晝起如江湖主人畏炎閉關臥  
聞有老鳳來儀無德星璀璨聚牛女薦以秦炙尊魯壺  
天公潑墨怕沈醉片雲冉冉垂龍須長虹紺碧挂高樹  
稕裕車蓋千流蘇拄杖遠矚待明月素暉耿耿生庭隅

趙字赤壁賦

鷗波主人氣清華佳人明粧簪春花鏡中作態媚夫婿

不能莊語惟敲斜孽窠蠅頭各有體黃庭洛神蒸雲霞  
欲持寸木量日觀函牛巨鼎烹魚鰕東方象宋廣元魯  
示槩法遙想腕骨真專車峩冠端笏氣嚴肅廚娘澀縮  
何敢譁或云放縱始蘇米驂騮不樂銜轡加大江東去  
天馬賦枯木怪石生枒杈二公自破南山律波起平陸  
騰蛟虵森森巖電吐奇氣不屑春困搗琵琶還君此帖  
發長喟門外老樹來鳴鴉

題清石師高郵詩後

彭城積雨水曾波一編快讀挑銅荷根觸舊事緬夷匪  
犬羊肆據鍾山坡沿江列城以十數牽羊擔酒詞溫利  
因糧於我不敢缺茲高賢哉何媿媿桓桓將軍未解事

向城紛置槍與礮巖巖使相作都統輔以君陳佩玉璫  
淮南節度老且憊高牙大纛雲霄摩屯兵三萬蝟毛縮  
惟聞伸紙書擘窠陳列水陸燕蕃使士有諫者遭譴訶  
珊瑚孔雀燦纓組烟行媚視唯與阿吐番幸未劫延賞  
謙從驕蹇顏俱醜春秋之盟恥城卜佞詞入告如祝鮓  
書生謀國古如此尙未臣妾隨東倭先生一城大若斗  
忠勇高峙山嵯峨士兵團練備戰守赤手欲蔽江淮河  
此身誓不與賊立激發士女同揮戈奸徒撝舌羣寇遁  
風雨晝夜巡如梭邗溝以北賴保障徵調不繁令不苛  
眾志固結屹若鎮屬詞比事功孰多十年偃蹇尙百里  
退食惟聽歌五紵昨聞當路識卓茂潁川欲使馮異過

驛驂駑駘已上駟老驥驤首鳴陂陀無人解以柳易播  
臣精爍爲心腹痾避賢引退古所尙一竿歸臥湘江蓼  
偶從詩本露鴻爪莧爾笑視迎風哦湘蘭沅芷有時歇  
秦郵德澤民難磨古今烽火照萌渚九重側席思廉  
頗空山寂莫豫章老令人搔首欽常何

放歌

力田不逢禾黍豐服賈未必皆朱公漢廷牧豎有卜式  
賢聲遠出關西東朔風淒厲天宇廓萬里只送南飛鴻  
黑洋窈冥礁石惡過涉乃望蓬萊宮眞靈位業錯忠佞  
仙骨豈與凡人同君不見十年爲郎殿陛中一日作賦  
聲摩空升沈人海樂與苦勸君歸射南山虎

示諸生

雜文

咸豐五年乙卯

圻人泥壁作書室翳翁鑽之不得出兩窗中有徑丈門  
不見至虛見至實斯文妙境在課虛塗以蕪茨資羣書  
此心瑣瑣眾生相縱飛花雨非如如

又時文

畫佛啟牖光滿庭畫龍飛去無風寔妄言妄聽若說夢  
誤殺一世諸丹青誰空倚傍泯得失盡掃駑駘天驥出  
百年我亦成古人又泥吾言求致寶

又散文

才如樹石天然成氣如峯巒不喜平問君何以忽縹緲  
妙有雲霧山腰生古文佳境在譬况莫笑莊生語皆妄

移諸寶相賴子春海山寂寂秋波漲

又駢文

同施粉黛同珠翠漢宮春風十四位毛嬙顧影人亦憐  
如文妙在寫送致盤庚大誥音聳牙風詩詠歎增吁嗟  
彥昇蘭成擅絕響明妃哀怨存琵琶

將之楚游辭諸生餽

乙卯

五年備受諸生醴妻孥亦飽徽山米百無一益方自慚  
啜水茹茶甘若薺觥觥幕府來公文召我攜筆參其軍  
書生卽不便戎馬要知時務通風雲古人苦說功庸稱  
何分簞豆何千乘教數全無尺寸勞離亭敢謝瓊瑰贈  
西塞山西梁子湖此行豈果思良圖或可一舸回東吳

北望涓水之汴都時吳錫粒生在大梁幕中坎軻異日百不遂便當  
歸骨青山隅願君留此待病夫

一戢港辟風書所見

江干老屋藏深松儉父切肉兒貰酒溼煙作雲酸耳目  
瓦盆取醉醫國手竿繩牽船艤汊湖十人下旋百人呼  
船中少年一事無自折荷蓋弄明珠

辟雨黃州城外荒洲

葛衫小坐江上亭江雨氣雜蛟涎腥從予二客搖白羽  
遙指龍挂西山青堂上誦詩水瀉瓶堂下渴睡頭觸屏  
回舟解纜趁潮長白鷗低昂江窅冥

篠船宅占筮

子房窗夜念大開故卜之辛酉

粵若前龜緯與讖傳以妖妄爲厲禁昌黎南遷卜筮尊  
偶代卜筮非覲蔭山神責予見事遲壯無學識老何爲  
此非山魃乃狐狸聊用戲君君自知人生少日無氣力  
鏡中霜鬢將安期

張牧之載馳瑣記

理由心悟老不忘名緣妙術蘊彌彰眾工皮相莫須辨  
書成惟道君馬良張君軒昂善相墓西尋龍脈窮甘涼  
三元法式辨清濁上溯真淳元與黃糝雜沙土風水石  
書以沙金石火風木六氣以風雨晦明寒暑兼化非能  
及水土爲在地五行爲在天之六氣常君言六氣有知者以術彌缺陷補苴何足開天荒要  
從青海得血汗於傳有之誰推詳日持正論語幕客背

面蹄齧馬鬣張自稱駑駘不解事堅辭芻秣歸桐鄉君  
城朔風颯颯雪如掌高下隴阪來襄陽周侯周鼎卿好  
客贖資斧山川能說無雁行投予一卷手自記敘地敘  
事推微茫腐儒不諳松友學爰居徒立鐘鼓旁惟當細  
話風土記竹窗寒夜尋茶鐺

題王氏海島逸志

男兒致身苦不早駕船命儔尋海島覓地遠從西班牙  
珊瑚火齊猶下寶海中有石雖虎魄海中有水雖龍腦  
所重關國日千里商賈壟斷何足道不然記載廣見聞  
後有學人足探討最下移家作徐福別子爲祖亦翁媪  
安能章句村塾閒飯麥羹齋不自保

少年

少年挂名籍爲儒賦施夸毗無眉鬚入營乾沒辦文案  
蒿關權算窮錙銖旁人側目老卒悅越紉作綺黃金盃  
依附草木列薦剡翠冠晶頂竹使符歸來狹斜有交接  
旦夕怒馬騁交衢昨夜來宴軍壘今買歌妓傾明珠  
下河生女紅兩頰笄年例作軍人妾軍人有婦苦持家  
不及桃根附桃葉

寄計芾村光化

辯才未若公孫衍劒術未講魯句踐旗亭酒熟結客嘗  
禿鬢敝衣雙足繭少年待詔金馬門不肯低頭事恭顯  
馬前長揖大將軍舌瀉銀河洗兵燹徒戎有策適不用



徒涉荆揚豫徐兗謁歸荷篠武當山豕瘞毛錐師善卷  
書來眷眷重守分似爲清時惜軒冕峰巒無恙白雲多  
舒卷無心爲君勉

丙寅乞梅花於傅麗生

高人必當在空谷谷口白雲雜修竹神仙之境不易求  
時有哀弦出茅屋今來十日不舉頭難浣胸中塵萬斛  
乞君瓦盆一株梅好向清齋伴幽獨歲寒風雪壓江城  
凝與香魂共棲宿

寄子涵

萬牛力難挽氣運聖賢豪傑徒含愠雷殷泉下雉先雊  
蠕動蚊行盡能奮村南夫子蹇且屨學不逢時能守分  
幼思椽筆鸞鸞鳴老厭楹書豚犬靳近來木雁兩不居  
止水無波津獨問老聃經頭陀行季漢衰周貽古訓評  
量多謝汝南賢衛賜原思皆不近自哂

仙人二十韻

仙人鞭黿大海東霞裾往朝蓬萊宮瀛洲方丈左右肘  
驂麟馭鳳梁長虹王公無言西母笑一洗塵劫諸緣空  
後千萬年有徐福暨緇髡流蝨其中繼體宣化雜用治  
百二十餘代所同皇綱款愛澤遠漸鱗介亦偶琛費通  
扶桑金樞近凋瘵穢負衫愆徠妖風耶穌貴強不貴理  
膏淵顛嶽成沙蟲滃澗鼎沸氣咆勃貢以火齊珊瑚紅  
西柰七誠入藏府仁暴所帥由王躬吾聞五德互衰旺

詩七  
八  
金火變化尤強雄屠龍伐鯨恐未艾將踞太平闕祝融  
乾坤剛氣未遽絕詎無召虎無非熊材官荒唐衛卒懦  
天卽欲佑難爲功漁人蜃戶有豪俊錫以鞶帶恩龐鴻  
廣斥步步設險穿墨翟爲守輸難攻聖王文武有輕重  
一大訓三戈矢弓資其土地與皮革魏絳所和惟山戎  
腥膻足虞同伏莽衢歌久徹神堯聰靈蟻潛淵獮獺遁  
羲和奉日輝彤彤

贈甘竹生太守

藐姑神人不補吏靈威丈人猶藏書苦心深戒兩黃鵠  
盛德想兆三鱸魚纖雲纔卷露望舒娟娟流素臨前除  
人生盈滿不可居弦魄晦朔守厥初桂樹終古常扶疏

寄謝甘竹生惠湖絲佳茗

越蠶繅絲白雲裏定笑經生注細瑣團龍鏤餅綠雪沈  
足潤勝流談炙輠平生口啞復荒經桐帽棕鞋無不可  
故人遠宦古會稽以經飾治與時左公餘忽念車笠交  
采茗裝綿包貼妥嗟余守拙久絕遊寒翠深媿催綢繆  
昨關小圃自灌溉差喜草木翳輒邱圃有小阜名曰輒邱拜君嘉  
貺肝腸熱不須歲晚憂冰雪幾輩雖誇狐貉温一壺幸  
汲寒泉漑落鈕獨步望梅花欲寄一枝共清絕

郭嶽晴總鎮少年小照

三十作圖五十題性情不改改頌儀請爲補說四十姿  
頎身修髯豐兩頤顙高聲大十指錐巨掌能劈華屣屨

九  
挽強貫革左右馳事大將軍無委蛇由軍校洵厯偏裨  
致位都督因前資近乞骸骨歸儀睢傍鄉先生文正祠  
孫蘇門學有遺規閉戶靜坐養端倪卻掃不見黃鬚兒  
酒酣不訪高漸離今更鬢鬚成銀絲箭瘢斑剝醫不治  
佳客相召冠帶弛啖肉連舉可十卮此外嘿嘿如鈍癡  
戎爲故將軍之詩醉尉勿坐無所知

周縵雲侍御得史忠正公督師印索賦詩

螭紋盤屈融生鐵梅花嶺上埋香雪象緯昭明 鼎運  
新西山精衛存孤節蕭瑟淮南草木深壞雲壓陣失森  
沈寸天尺地尊 堯遍白刃空卷輔桀心虛名不足加  
強鎮開營鈴峇名王信飛檄難召北府兵成功徒慕司

農印江上誰人拜杜鵑朱文八字曙星聯定知沁入孤  
臣血瑤草迷離久化烟

介堂

士禛

宗彥以畫箴見餉歌以還之

抱虛山人閨風客遠道貽我半規月月中忽作木夫容  
一碧秋烟月邊發昔歲遇君徽山頭口談篆籀如河流  
吉金貞珉偶刻畫風雨盡化千龍虯晴窗遣送滿竹笥  
望氣賈客驚圖球卽今老鶴歸華表不使纖塵自纏擾  
還君寶扇爲君歌閒情雅興今人少仁風依舊在君懷  
相伴松門寒兔小

贈張廉卿舍人

青海汗血走千里懔下終與駑駘齒茨峰鐵英爲龍淵

含光沈影霾山川風胡伯樂一論贊坐令舉國皆稱賢  
有唐以來重進士竹帛旂常由此始君卿子雲筆舌工  
曳屨侯門徒自憇舍人文章正始音尋常一字直百金  
胡不振翼鳳池上對揚奇木歌靈禽胡爲戢影在鄉井  
祇令文彩驚山林側聞上駟求天馬考工大匠多歐冶  
早晚朱弦試一彈如君莫歎知音寡

趙厚子

仁基

岱顛觀雲圖

慶雲在霄誰不觀白雲在山無人看徂來新甫列屏障  
白雲臥對秦松寒先生登岱看日出海氣溟濛瑞雲靄  
金鉦抱珥麗八荒潤澤人天苦無術丹霞翠巘烟颺颺  
望霓赤子啼昕宵風霆指顧觸石起萬里一夜蘇良苗

如中不乏爲霖者應龍乘之雨天下山雲水雲彌西東  
誰不看雲誰如公

美人對鏡圖

團圓玉鏡開菱花美人娟娟如朝霞鉛華芳澤不肯御  
嬌啼似怨平陽家平陽富貴天尺五一斗明珠買歌舞  
妝成始得小侯憐早被子都通目語世人信目難信心  
江花笑春江水深曉星歷歷橫塘路昨宵又送何人去

題黃烈婦圖

爲徐縷樵作

夫爲古井妾爲水玉鬢銀牀誓終始鹿盧修綆百尺長  
古井已眚水不起朱繩三尺斷復懸上有姑嫜下有子  
撫棺擗踊強視息妾身雖生妾心死嗚呼嘻君不見玉

顏婉婉入楚宮桃花結子春風紅又不見程嬰豫讓操  
行異鴻毛泰山難強同丈夫知己不能報對此感慨填  
膺胸

題某小照

三十作圖五十題性情不改改頌儀請爲補說中年姿  
及學業出處行誼兌上豐下闊兩頤疎眉細目微有髭  
洽蔡傳書朱氏詩貢太學爲博士師長安米貴長苦饑  
以能文東游濰淄事強諸侯不逶迤或請府主言其私  
抱槩南歸過不其遇狐父盜喪其資有哀王孫者延之  
爲訓收兒牛馬醫如是三年始載馳粉社邱墟草離離  
零丁婦女百不知親舊驚呼哀以思出圖乞余爲之詞  
余詞不足寒君悲且君富才阨於時匪於厥性有成虧  
衡門陋巷可棲遲暇遇故人借一鴟此外將復何所爲  
此外將復何所爲

奉送湘鄉公入覲

華旃翠葆張離筵分陝節鉞雄三邊沙隄垂虹接勃碣  
三能移曜齊趙燕惟公功德浹江表婦孺走卒肝脾鑄  
綠波芳草莫終極欲繪春意徒蹶筌憶昔蒙訓繹班史  
公會訓以自起然疑請質如雲烟當時治術貴黃老獄  
批證讀漢書市不擾師自然公拊遺黎政寬簡家人父子情纏綿儒  
林文苑日答問若師弟子同青氈栽培善類作首種休  
養元化歸陶甄卽今翊運相 天子光近 日月尤乾

乾升中告成詩博澤蕭曹豈遜留侯賢我公勤施不伐  
善笑我窺豹真淺淺自慚年旄義特儉如蘇訓詁勞丹  
鉛過承藻飾十寒暑澤雉飲啄全其天龍江雨鍾阜泉  
其山崔峩水清漣有獨樂園乃更傳功成事遂學辟穀  
飛鴻遵渚瞻公旋

晤齋雅集圖爲羅少村作

一人古兒冰玉瑩奚童負書隨之行二人觀畫互品評  
若問若答皆有情銅琵琶鐵板歌縱橫和者弄笛聽倚楹  
主人讀書有法程氣靜以和無所營惟余疏狂百感生  
高談直欲銀河傾尊有旨醕栢有羹竹樹蔥翠蕭齋清  
宦况鏗削康莊平何減二蘇王晉卿龍眠白描六法精

金筑仙人筆與爭此會此圖不多見快然西指晴川晴

趙蔚卿螺山問字圖寄王子壽

用遺山寄溪南詩  
老韻

異時曾買荆江渡五雲遙羨螺山路節樓留客屬著書  
未到夷陵自知誤榻來故里掃薜蘿舊業重溫墮雲霧  
夢中苦憶采芝翁千里迢迢託魚素趙生年少作壯遊  
忽棄長矛學詞賦感君高義乃請纓北出蕭關謁都護  
知君下筆祛邪蒿春風累破寒蟲號東南人海競才俊  
一紙又濟陽侯濤陶子作圖記鴻雪竹樹使我思江皋  
秋鐙聽雨復大笑吾兩禿翁何能豪

又

憶昔邾城生戰塵汎舟洞庭勤問津螺山俗樸人事簡

愛之欲作由東隣時平南歸遇莫五子海內詩老吾三  
人相國愛才苦招致君獨侍養荒江濱采蘭殺雞絮滌  
瀧暇抱經史私吟呻往年上書應 明詔葵忱旣盡輕  
朱輪元戎西征訪方略欲進貂蟬防君嗔江鷗海鳥玩  
流俗偶於愛好留其真台星冥冥邵亭圯寒蟬緘口思  
容身念君未央復西笑竟終東越於西秦此未用韻

題趙蔚卿圖

學書學劍皆千秋不肯鄉里學少游持檉橫槩出門去  
隴山西北鳴沙州羌人氏帥蝟毛磔衛公正建籌邊樓  
宏肇不喜毛錐子罷歸幸遇陳太邱太邱道高位不顯  
安能致君千戶侯夢中仍出蕭關道黃雲八月低衰草

一夜軍符催進兵橐駝踏雪不敢鳴邳離義陽命自貴  
幾見文士真專城君家門第原珂里南皖公山北易水  
勸君只作竹林游暇則晴窗鑽故紙

張提督長濠

鑿濠百里如長虹襄陽內外云不通援賊西來拔砦入  
寸寸裂之春冰融疲民百萬事畚揭饑寒趨赴期成功  
永安往鑿尙未久竟欲持此爲英雄錦衣玉食奏橫吹  
上將牙帳捎天風鍾山雨花望愷樂作奏待上明光宮  
餉精已竭壯士倦堅城屹屹誰能攻可憐將軍仁與武  
愛民殺賊無與同淮陰未隸紱孔費坐使豪傑悲天窮  
雲陽丹陽數百里至今賽社多村翁隻雞斗酒拜且祝

遺愛烈烈留江東春柳穆穆草青蔥斷塹絡繹山花紅  
行人指點故鬼哭白骨久朽長濠中

記馮丞築堤 忘其名字

湖西吐雲釜上蒸開溜琤琮凍釋冰焮風助以鳴萬竅  
動植得勢羣飛騰庵前老柳百年物徐掀翠髯張兩肱  
舒眉展腰解大帶高者頰視卑者承掃地忽作鴿鴿舞  
宿莽漂泊遭侮陵前條奮起苦相迫後枝乘力思代興  
一現一伏碧波疊十盪十決青眚凝壹聲喧厯若山坻  
格堤數丈因之崩旱久水涸賴無事傅堤遠近齊吟噲  
急負芻芟覘楨幹老少男婦呼其朋胡牀小蓋來雨丞  
秀礪召兵抃陜陜引河咫尺孰敢馮如辟大溜心兢兢

牛土已檐楹已緼區別車輛輕重稱使者賦錢莊且矜  
或平或減或稍增須火窪窳成陸陸坦坡透迤馬可登  
計工丈尺度於繩料科以束觚無稜高卑厚薄若干層  
河帥下書書其能曰此庸由大小馮馮君謙抑如不勝  
歸功夫役寵弗膺晞髮濯足除行滕箕踞呼酒鮮剝菱  
卒徒雜坐歡相應涼波半輪新月澄居民抃賀祝相仍  
使君今者階高升長官嘉褒豈易得使君今者宜顯徵

和賀幼誠喜雨

婦病九旬出門少山廚無烟同野苧傷神昔曾繼奉倩  
活人今方覓李杲昨聞江北憂旱蝗咨嗟涕洟過子卯  
老儒硯田無一寸非若三農愁糞草所愁伏莽徧山澤



惟賴年豐消慝早疲民喜亂鮮蓋藏乞活不懼縣官惱  
近者蕩子眎以奢小戶憤氣激幽室尙書清德動天地  
幾取夫夫投有昊牲幣奉祠默引罪義感羣龍舞顛倒  
風姨阿香助威猛海立雲垂徹昏曉高阪千里禾青青  
豈僅耄年免枯槁病妻亦幸不董逃霍然有如魚躍沼  
平生不耕復不織祇託虛名得温飽雨暘時若長官賢  
美言願賡張老禱

梅翁詩鈔七終

受業外孫吳鏗慶隨校

梅翁詩鈔八

江甯汪士鐸

甥上元吳達重校刊

題畫琵琶行

高低不斷秦山青翦作朱樓雙畫屏山下征人莫回首  
學成琵琶推卻手征人未返雁南飛樓中塞外兩依依  
琵琶若解傳心事留取鷓鴣待子歸

六月二十二日臺城看荷呈主人洪觀察涇舟

仙姝綽約千紅裙世閒粉黛徒紛紛湖烟山雲綠深窅  
瓜皮柔櫓聲微聞城頭統統嚴四鼓束縑乘篋勇可賈  
吳宮後城八尺寬賓主揖讓車上舞共凭女牆作几席  
右挹蔣陵左幕府平林遠水送飛鳥長嘯蘇門孰今古

城內野圃隱千家城下卽晚香園藝菊所也東郭桃李真狹斜桃有  
鶯有鶴誤高下主人愛汝君子花

可笑

福生無形禍無胎門下賓客喧風雷望色占垣僨者來  
天寒足跣弔者哀能令公怒令公喜我昔躬逢日感起  
於今閉戶如枯禪一任野狐闌止水

虞美人草

壁上諸侯雙膝走臣等拜上將軍酒美人親侍龍虎威  
楚舞低回垂素手眼看豪傑如蟲沙氣化長虹貫樞斗  
憤王宮圯風蒼涼弱草亦萎官道旁憑君莫上長陵望  
野雉年年過辟陽

贈劉樸田

雞犬丁籍共四口公嫗家具才一車門外雪深突烟溼  
隔牆猶聞君讀書斫陣馳馬君不如朱門觥觥不曳裾  
計然白圭術復疏慕汜勝之懶把鉏於世法當填溝渠  
談方望溪陸三魚此二子者時所譽或假途焉建旌旗  
君如學之必得輿慎毋再爲龍之屠

題扇

天下畏塗有二絕騰格里寒戈壁熱明駝畏熱改他途  
飛霜以寒全其潔灼灼不羨桃李華皚皚自抱薇蕨節  
江表才士美少年夏蟲未可語冰雪

小鳥

小鳥呼公復呼姥草蟲警風又警雨阿誰爲虺與爲虎  
取諸王章玩之股日生東月生西北斗有柄與天齊秦  
山有伍伯沈履竈髻矚爾爲爾玩人如三歲兒雞鳴犬  
吠市人皆知之烏乎噫

夢林延之寫某之真

眼前不乏丹青手皮相紛紛辨妍醜環肥燕瘦縱形似  
意態明妃果何有昨宵夢見林延之寫真畫神不畫皮  
偶覓桃李霜後姿調脂研粉描雙眉戚卮子姓不相識  
對鏡亦不知爲誰搖落仍留冰雪肌江空露冷韻珊遲  
分明九曲溪中月曾照新藻綽約時

虛詞

飢想大官熟羊脾飽拾芋橡借狙嬉無求有累爲口腹  
其俗和緩無緣醫采鼈宜陟山崎巖種秫乃成酒醇醜  
人生不自用筋力毀茶辟穀真虛詞

筍尙含苞

筍尙含苞節未知風來水面已漣漪隔年何事能相保  
曠絕微之訣絕詞孟水須清不須滿美人何妨步月短  
明珠有淚玉成烟琴曲終宜廣陵散君不見生前人人  
青陵臺生後人人黃鵠哀五陵裘馬醉年少私雇香車  
迎夜來

題扇

畫青綠海山也

華嚴樓閣有妙境文人慧業偶及之我欲拈出示大眾

微方子春誰其師昨宵靈蜃吐怪氣玲瓏殿角蹲雙獅  
雲霞絢爛宮樹遠似聞威鳳時來儀碧窗朱檐畫窈窕  
海風吹凍干玻璃琴聲人意到此絕雖有十指揮弦遲  
藩閤斥鷃笑飛隼高步亦爲誰徑窘是難是易誰能知  
問空空兒謝不敏

蟬蛻

小蟲飲啄關得喪蠻民伏尸動軍仗絡緯促織工販繒  
紅蟬癡情化脈望莊生妄云蟲能天機權乘除算無量  
秋原霜初柳影疏寒蟬嬾附豐貂居伊留一曲寄枯木  
此外所掇皆蛻餘

悼王信甫寄其尊人子壽先生

高吟清新師夢樓丹青妙欲追廉州王郎詩畫有家法  
翩翩雛鳳儀丹邱會翔彩羽瑞帝所揖讓羣后偕鳴球  
不然說經如景侯作文奧折荆公儔螺圻翠色照書棧  
老子顧此能解憂霜威蕭瑟凋萬類穠華一夕悲梧楸  
遺文在手那忍讀淚隨潮言西南流勸君割愛且投杖  
尙有軾轍從君游子壽凡

月琴

疏桐挂月臨金井月落柯枯井無影阿誰玉斧寫圓形  
緬以鋼絲彈夜永訴離訴怨不訴懽傳出悲涼心耿耿  
柔懷往復曼以輕指下嬌滑來春鶯道人淨耳格不入  
負手孤行松下立

有生

有生卽有老病死日側月虧盈則爾唐家翰林浴室殿  
妃白儷青致金紫宣公衛公一二賢李白猖狂等醉鬼  
宋之歐蘇明楊清張居一千年來六君子宏肇安得用  
毛錐短後之衣趙王喜儒冠溺罷投濁流弄戟探丸乘  
運起豕苓桔梗互與廢或息或消理如此嗟哉吾黨魯  
兩生甘對南山歌泌水

得印歌爲劉誠甫顯曾書

仙人昔割元圃根白鑄賤名朱梅邨劫火百鍊墮血海  
鯨鯢環視不敢吞日勞丁甲互守護昨宵虹氣騰千門  
徧國朝服賀正旦九達絡繹車馬奔豫章會館市人滿

高子忽爾停緇軒摩抄此石自驚異贖回仍皮梅花認  
劍合弓得那足比石交乃有理數存臧書端研不得一  
久歎焦若咸陽原晴窗枯坐相視笑儼逢舊雨重寒暄  
至人忘懷况玩物聊記緣起爲之言

寄謝甘竹生贈南棗龍井茶且聞其德政故爲頌之

會稽太守天下無勤官愛民惠澤敷公餘遙念種楮叟  
遠餉兩餅吳山腴風篁嶺高境幽爽雲露蒸茁青珊瑚  
老僧好事偶采擷筠籃竹杖偃且癯怪松枝墮作虬走  
活火焙向南峰隅我方逃暑忽得此珍逾百斛明月珠  
更有南棗產義烏形大銳上宜呼極小窗啜茗足遊實

佐以古籍真仙乎知君憂樂在萬姓愷澤亦不遺一夫  
山陰道上富篇詠何亞飛轡游清都巖有禹穴水鑑湖  
安君清嘯民困蘇會稽太守天下無

除馬齒莧

薙氏殺草斫與芟句廉茲具窮嶮巖瓦邱廣輪厓一畝  
馬齒布濩青如緘近齋尋丈不拄杖霧露冒沒浸長衫  
取法往事變水火燔石作灰塗其臙斬天一雨助燥熱  
奪厥甘溫加苦鹹是物陰果類姦佞欲絕其族同剽剗  
惡木一二釋不治例恐蔓延此其凡廓清唐涂免泥滑  
佳茗日供飽尊銜

謝劉恭甫選余文詩諸雜錄

丁丑三月十四日

海內大師王與惠君家說經亦三世漢唐儒學能幾人  
祖孫父子及昆弟就中伯子尤相親杯茗論文劇心契  
揚州夢覺三十年曾侍耆艾談丹鉛令祖孟瞻先生揚王吳蔣  
並方駕季子句生讓之及文若維清兄弟商榷史法無疑然雲烟過眼  
再相見通誼巨集成山淵閣篇寶帙未易刊虹光昔昔  
橫星躔尊公伯山同年通誼堂文金陵志局聘才傑借君揮筆如修  
椽一塵不動決盪快家法彪岡兼談遷旁人拍手徒健  
羨但祝鴻鵠高騰騫嗟予莞獨甘焦卒晚知學道猶虛  
器平生無福得幽棲若耶山北雲門寺此後誰人重蜀  
巖勞君料理諸文字

薛慰農先生清涼撰杖圖

文翁用柔常爽剛斧我杞梓成圓方只聞元宵正似鴨  
餘皆弱飾爲鸞皇廷尉謂鍾山院長李小湖聯琇高簡真太華峯巖  
戍削垂青蒼觀簪春風扇萬物句出萌達嬉朝陽二公  
提攜本驂靳文武政喻弛與張自慚頑鈍木已朽雖欲  
丹腹無輝光負書握槩冀吾黨追琢令器如珪璋款門  
昨逢張敬緒自云負米遊荆揚太常蘇侯善相士必加  
羈絡俾騰驤於戲兩公江東所師表後進仰若星雲祥  
薛公好賢更超絕天機所得遺驪黃洛陽賈誼正年少  
撰杖何幸登公堂

戲題種蔬圖

十年學書書不成一朝擊劍人已驚登城豈必晉鄭白

婦孺畏見曼胡纓道逢高車載雞狗朱朱嘻嘻紛吳儂  
淮南仙去鼎未去坐令方士欽其名不其老翁抱儒書  
課虛責有世不如笑指二子正爭道高臥甘夢羊蹴蔬

請雨

平生吾不如老圃行吹蘆笙擊土鼓兒童被髮扛寓龍  
請天爲我三日雨昨晡蝮竦方在東今晨赫赫銅鉦紅  
村巫問神神已醉屠沽索債烈日中

小鳥

小鳥載止忽載飛十步五步防危機黃金易成年難少  
青春今來事昔非靜者觀棋爛樵斧幾輩結網尋釣磯  
道人眼冷心更冷明月皎皎烟霏霏

鳳凰臺懷古

用歐陽滄浪亭韻

謫仙遊踪徧吳越鳳臺傑作無長篇三山二水雖足壯  
吳宮晉代徒爾然衣冠邱墟漫割據臺前但見江回環  
夷吾不復出江左幽徑花草空爭妍譬如鳳凰已千仞  
樊籬鷄雀啁與喧長安雖近未得見金烏赫赫遮雲烟  
先生此言有深意永王悖逆非良緣虎狼道梗隔京邑  
身無兩翼如飛仙自唐以來又千載荒臺突兀倉山邊  
秋風命儔一登眺江濱已變膏腴田千畦萬畝稻梁熟  
四望無復波清漣荒烟喬木雜邱隴避世何處來漁船  
村農荷鋤爲予說往往耕得前朝錢豐年不寶寶符瑞  
元嘉舊事誠堪憐野人那知有鸞鷲惟知含哺終其天

秋冬報賽偶攀陟靈巫擊鼓聲淵淵嗚呼太白若見此  
騎鯨大笑甘長眠風帆沙鳥隔城堞天險防守思當年  
歸途落日滿林木高吟古調憑誰傳

大功坊懷古

用東坡書王定國所藏烟江墨嶂圖

真人驅龍起淮泗誰其輔者圖凌烟燕秦已定更北伐  
封狼居胥銘燕然羣雄削平釋兵柄賜莊窈窕卑平泉  
定位第一曰魏國龍以士田匪山川大功無匹昭綽楔  
邸第橫壓秦淮前鍾山淮水兩環抱勅書照曜城南天  
追配蕭曹暨竊鄂宗臣遺像清以妍胡風吹沙暗畿甸  
鐵騎蹙踏金川田名臣巍功皆宿草安劉平勃無天年  
朱能張玉豎子耳妖墓食月吞嬋娟齊眉峯高書奏捷



飛燕局促難安眠藩籬自撤眾軍潰宋襄仁義啼銅仙  
賢哉令嗣甘削職守祠不作從龍緣遇合際會有天數  
爲王慨想鹿鳴篇

題李新吾孝廉印存

斯翁八體眞球璧芝草蟲魚并鳥迹秋深虹氣滄江青  
月霽蛟盤瀛海赤泰山瑯邪豐碑殘人世何從師片石  
先生作篆研六書摹印相傳高典冊朗然照寶驂星辰  
赫然動魄森劔戟翻然朝霞冠瑤岑忽然夜光輝太液  
魚龍百變無定形嗣吳文家專此席日後說法雖多人  
細才一米鉅不尺深谷高岸三百年文士詩筒珍手澤  
贗鼎雜逡羅市壘巨眼猶將誤朱碧幸君此譜拯俗工

振廩救飢如粟帛君鄉賢者完白翁鵲鸞翥鳳江之東  
延陵好事變古法詰屈屢入珊瑚紅鰕生愛此若飢渴  
無黔敖誰濟其窮讀君此譜口涎吐日夕望君惠一通  
日斜人老光熊熊倚杖柴門遲飛鴻

求鐫同是日斜  
人老六朱文

悔翁詩鈔八

終

受業外孫吳鏞慶隨校

詩八

九

305  
20

終

